

Oqaluuserisassat pillugit nassuiaat.

(Inatsisartut Siulittaasoqarfiat)

2012-imi Inatsisartut upernaakkut ataatsimiinnissaannut UPA 2012-imut oqaluuserisassatut siunnersuutit siunnersuutillu oqaluuserisassanngortinneqartut 15. marts 2012 siullermik nassiuunneqarput.

15. marts oqaluuserisassat nassiuunneqareersut Naalakkersuisut immikkoortoq 33, Meeqqanut suli atualinngitsunut perorsaanikkut inerikkiartuutaasunik ulluunerani neqerooruteqartarneq pillugut Inatsisartut inatsisissaannut nr. xx, xx.xx 2012-meersussamut siunnersuut, tunuartip-paat. Immikkoortoq oqaluuserisassanit peerneqarpoq.

Oqaluuserisassat nassiuunneqareernerisa kingorna Naalakkersuisut immikkoortunik pingasunik oqaluuserisassanut ilanngunneqartussanik nalunaaruteqarput:

Imm. 29, IMAK-imut tunngasunik isumaqatigiissutit il.il. nutarterneqarnissaat pillugu Inatsisartut inatsisissaannut nr. xx, xx.xx 2012-meersussamut siunnersuut. Siunnersuutip pisariaqalissappat ulloq 10. maj siullermeerneqarluni, 15. maj aappassaaneerneqarluni 22. maj pingajussaaneerneqarnissaa siunnersuutigineqarpoq, aamma

Imm. 36, Danskit naalagaaffianni innuttaasut il.il. passitaarnerannik inatsisip aamma nunat alamiut pillugit inatsisip allanngortinneqarneranik inatsisip nr. 613, 14. juni 2011-meersup § 1-iata (passini il.il. pussuit ipaasiorderi) ilaannakortumik atuutilersinnissaanut oqaaseqaateqarnissamik Inatsisartut aalajangiiffigisassaattut siunnersuut. Siunnersuutip 16. maj siullermeerneqariarluni 30. maj aappassaaneerneqarnissaa siunnersuutigineqarpoq, kiisalu

Imm. 41, Ineqarneq pillugu ingerlatsinermut nassuiaat. Nassuiaatip 9. maj oqaluuserineqarnissaa siunnersuutigineqarpoq.

2011-imut Nunatta Karsiata naatsorsuutai suli kinguaattooqqissimapput taamaattumillu Siulittaasoqarfik siunnersuutip siullermeerneqarnissaanut ullormik nutaamik siunnersuuteqarluni, siullermeerinninnissaq maajip ulluisa qulingiluaanniit maajip ulluisa 24-iannut nuullugu.

Inatsisinut ataatsimiititaliap imm. 9-p, ombudsmandimut taartaasartussamik qinersineq, UPA 2012-imi kingusinnerusumut kinguartinneqarnissaanik qinnuteqarpoq.

Siunnersuutit ataasiakkaat siusinnerusukkut ataatsimiinnerni siullermeerneqareerput UPA 2012-imilu aappassaaniigassanngortinneqarsimallutik.

Siulittaasoqarfiup inassutigaa siunnersuutit taakku toqqaannartumik taasissutigisassanngortineqartassasut, Inatsisartuni oqallinnerup nangeqqinneqarnissaanut immikkut pissutissaqanngikkaangat.

Naalackersuisut Inatsisartunulluunniit ilaasortat qinnuigineqarput siunnersuutip pineqartup suliarineqalinnginnerani Siulittaasoqarfimmut saaffiginnissuteqartaqqullugit, siunnersuutip suliareqqinneqarnerani maani inimi oqaluusereqqinneqarnissaa kissaatigineqarpat.

Ullut ataatsimiiffiusut ataasiakkaat ingerlaavartuussapput, taamaalillunilu immikkoortut ullumi ataatsimiiffiusumi oqaluuserineqarfissaminni angumerineqanngitsoortut ullormi ataatsimiiffiusumi tullermi oqaluuserineqartassallutik.

Oqaluuserisassat nalunaarutigineqarnerannut atatillugu Inatsisartunut ilaasortat partiilluunniit oqaluuserisassanut oqaaseqaatissaqarunik kissaateqarunilluunniit qinnuigineqarsimapput tamatuminnga ataatsimiinnissaq kingusinnerpaamik sapaatip akunnerannik ataatsimik sioqqullugu Siulittaasoqarfimmut saaffiginneqqullugit. Oqaluuserisassat pillugit saaffiginnissutinik oqaaseqaatinilluunniit siulittaasoqarfik tigusaqarsimangilaq.

Naggataatigut oqaatigineqassaaq Inatsisartunut ilaasortat ataasiakkaat namminneq akisussaaffigimmasuk siunnersuutimik kalaallisut danskisullu eqqortumik oqaasertalerneqarsimanissaat. Siunnersuutini oqaasertaliussanik erseqqissaasoqarniarpat taakkununga iluarsiiisutit siunnersuutip UPA2012-imi oqaluuserineqarnissaa sioqqullugu Allattoqarfimmut nassiu-teqquneqarput.

Uparuaassutissaqartoqanngippat oqaluuserisassat akuerineqartutut isigineqassapput.